

Broj: 01-02-3-642/15
Sarajevo, 15.05.2015. godine

Z A P I S N I K
**1. REDOVNE SJEDNICE PREDSTAVNIČKOG DOMA PARLAMENTA
FEDERACIJE BIH, održane 13.05.2015. godine**

Sjednica je počela u 10.35.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, predsjednika i potpredsjednike Federacije BiH, predstavnike Međunarodne zajednice, kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su Amra Haračić, Mirsad Kukić i Vjekoslav Bakula.

Prije nego se krene raditi, potrebno je izvršiti verifikaciju mandata novim zastupnicima: Almiri Ćosić, Almi Macić i Oliveru Radošu.

Mandatno-imunitetska komisija razmatrala je Izvještaj, te je kazano da se Denisu Zvizdiću, zastupniku SDA, utvrđuje prestanak mandata sa danom, 01.04.2015. godine budući da je imenovan na poziciju predsjedavajućeg Vijeća ministara BiH; Muharemu Fiši, zastupniku BPS-a Sefer Halilović, utvrđuje se prestanak mandata sa danom, 24.03.2015. godine zbog imenovanja na poziciju ministra u Vladi Kantona Sarajevo; Josipu Martiću, zastupniku sa liste HDZ-HSS-HKDU-HSP dr. Ante Starčević-HSPHZHB, utvrđuje se prestanak mandata sa danom 01.04.2015. godine zbog imenovanja na poziciju ministra u Vladi Federacije BiH.

U vezi sa tim Centralna izborna komisija dodijelila je mandate sljedećim kvalifikovanim kandidatima: Almiri Ćosić (SDA), Almi Macić (BPS-Sefer Halilović) i Oliveru Radošu (HDZ-HSS-HKDU-HSP dr. Ante Starčević-HSPHZHB).

Imajući u vidu navedeno Mandatno-imunitetska komisija predlaže Predstavničkom domu da verifikuje mandate Almiri Ćosić, Almi Macić i Oliveru Radošu.

U raspravi niko nije učestvovao.

Sa 73 glasa za, bez glasova protiv i bez uzdržanih glasova, usvojen je Izvještaj Mandatno-imunitetske komisije i time verifikovani zastupnički mandati.

Novoizabrani zastupnici dali su svečane izjave.

Budući da nije bilo primjedbi na zapisnike sa prethodnih sjednica, uslijedilo je usvajanje.

Sa 78 glasova za, bez glasova protiv i uz jedan uzdržani glas, usvojen je Zapisnik Konstituirajuće sjednice Predstavničkog doma Parlamenta Federacije BiH.

Sa 74 glasa za, uz jedan glas protiv i uz dva uzdržana glasa, usvojen je Zapisnik 1. vanredne sjednice.

Sa 77 glasova za, uz jedan glas protiv i uz jedan uzdržani glas, usvojen je Zapisnik 2. vanredne sjednice.

Sa 78 glasova za, uz jedan glas protiv i uz četiri uzdržana glasa, usvojen je Zapisnik 3. vanredne sjednice.

Sa 82 glasa za, bez glasova protiv i uz tri uzdržana glasa, usvojen je Zapisnik 4. vanredne sjednice.

Sa 83 glasa za, bez glasova protiv i uz tri uzdržana glasa, usvojen je Zapisnik 5. vanredne sjednice.

Zastupnička pitanja

Mahir Nurkanović uputio je četiri inicijative i postavio četiri pitanja.

Prva inicijativa upućena je premijeru Vlade Federacije BiH, Vladi Federacije BiH i Federalnom ministarstvu prostornog uređenja za donošenje odluke o gradnji stanova za mlade koje će Federacija iznajmljivati mladim bračnim parovima po jeftinijim cijenama od tržišne. Traži da donošenje ovakve odluke, uz sve pripreme radnje, ne prelazi rok tri mjeseca od podnošenja inicijative.

Druga inicijativa upućena je predsjedavajućem Predstavničkog doma Parlamenta Federacije BiH i Kolegiju Doma da ubuduće organiziraju rad Predstavničkog doma na način da revizorski izvještaj Ureda za reviziju institucija Federacije BiH o izvršenju budžeta Predstavnički dom dobije i razmatra prije izvještaja o izvršenju budžeta Federacije BiH za prethodnu godinu.

Treća inicijativa upućena je Vladi Federacije BiH da u budućem radu na relevantnim internet stranicama (Vlada Federacije, Federalno ministarstvo finansija...) postavi godišnji plan razvojnih programa sa svim informacijama koje taj plan podrazumijeva.

Četvrta inicijativa odnosi se na izmjene Poslovnika o radu Predstavničkog doma Parlamenta Federacije BiH i to da u članu 40. u stavu 1. iza riječi: "iz reda ostalih" potrebno je dodati riječi: "niti svi mogu biti iste spolne strukture".

Traži da se o četvrtoj inicijativi Dom izjasni.

Prvo pitanje uputio je Federalnom ministarstvu finansija - traži da mu se dostavi cjelokupna informacija o realiziranim kapitalnim transferima za 2014. godinu, posebno sa informacijama o kapitalnim transferima prema pojedincima, neprofitnim organizacijama i privatnim preduzećima.

Drugo pitanje uputio je Federalnoj direkciji cesta – postoji li mogućnost izgradnje još jedne autobuske stanice na magistralnom putu Tuzla – Orašje u dijelu koji se odnosi na MZ Dobrinja u gradu Tuzla.

Treće pitanje uputio je Vladi Federacije BiH - postoji li plan donošenja federalnog zakona o sportu i u kojoj se on fazi nalazi?

Četvrto pitanje uputio je predsjedavajućem Predstavničkog doma Parlamenta Federacije BiH Edinu Mušiću – traži da mu se dostave zaključci sa 31. redovne sjednice Predstavničkog doma Parlamenta Federacije BiH iz jula 2014. godine, koji se odnose na 27. i 28. tačku dnevnog reda. Informacije se odnose na raspravu iza koje su doneseni zaključci o načinu i dinamici pregovora za izgradnju novih termoelektrana.

Bahrudin Hadžiefendić prvo pitanje uputio je predsjedavajućem Predstavničkog doma Parlamenta Federacije BiH Edinu Mušiću – u kojoj se fazi nalazi inicijativa koju su podnijeli zastupnici Predstavničkog doma, koji dolaze sa područja Tuzlanskog kantona, a kojima su se pridružili zastupnici iz drugih kantona, prije svega Zeničko-dobojskog, Unsko-sanskog i Hercegovačko-neretvanskog kantona - inicijativa se tiče izmjene Zakona o pripadnosti javnih prihoda u Federaciji BiH i kada se na može očekivati odgovor?

Drugo pitanje - od resornog ministarstva traži da mu se dostavi cjelokupna informacija o stanju vanjskog i unutrašnjeg duga Federacije BiH sa ukupnim iznosima dugovanja, valutama, vremenu nastajanja dospelja obaveza i trajanja duga, te iznosu glavnice i kamate i informacije o kreditorima, te emitiranim obveznicama i trezorskim zapisima i njihovim kupcima zaključno sa danom, 31.12.2014. godine i pod posebnim dijelom za ovu 2015. godinu.

Treće pitanje - traži da mu Vlada Federacije i Federalno ministarstvo zdravstva odgovori u vezi sa inicijativom od 23.06.2011. godine a tiče se povrata dijela akciza na duhan i alkohol u zdravstveni sistem Federacije BiH.

Enver Merdić kazao je da je Kakanj jedini grad od Sarajeva do Zenice u kojem nije riješena trasa regionalnog puta koji prolazi kroz grad. Ima prekid u dužini od pet kilometara i nikad nije spojen, a autoput je završen i pušten prije godinu. Traži od JP Autoceste da se izjasni ko je dužan da ovaj dio regionalnog puta završi.

Drugo pitanje uputio je Federalnom ministarstvu energije, rudarstva i industrije – zašto Ministarstvo nije poduzimalo nikakve mjere za ovakvo katastrofalno stanje u rudnicima Federacije BiH?

Dennis Gratz traži informaciju o dopunskom pismu namjere od 08.01.2014. godine kojeg su prema MMF-u uputili tadašnji premijer Nermin Nikšić, ministar finansija Ante Krajina, te traži da se ono dostavi zastupnicima Predstavničkog doma i delegatima Doma naroda Parlamenta Federacije BiH.

Azra Hodžić kazala je da se u članu 21. Zakona o mladima Federacije BiH kaže: "Federacija će u nazivu ministarstva odgovornog za saradnju i koordinaciju zadataka u vezi sa mladim dodati riječ: "i mladih"."

Pitala je dokle se došlo sa procesom dodavanja naziva "i mladih" u imenu Federalnog ministarstva sporta i kulture jer je 23.07.2013. Predstavnički dom Parlamenta Federacije BiH usvojio Prijedlog Zakona o izmjenama i dopunama Zakona o federalnim ministarstvima i drugim tijelima federalne uprave, koji je utvrdila Vlada Federacije BiH.

Mehrudin Švago postavio je pitanja koja se tiču Revizorskog izvještaja o izvršenju Budžeta Federacije BiH za 2013. godinu, koji je proveo Ured za reviziju institucija u Federaciji BiH.

Prvo pitanje upućeno je premijeru Novaliću – šta misli poduzeti po pitanju negativnog mišljenja revizije Budžeta za 2013. godinu? Da li će biti pozvani na odgovornost prekršioc i li će se preko toga preći?

Drugo pitanje je, također, uputio premijeru Novaliću i ministrici finansija Milićević vezano uz prihvatanje revizorskog izvještaja o izvršenju budžeta iako znaju da u skladu sa Zakonom o budžetu nije izvršeno evidentiranje svih dospeljih obaveza na dan, 31.12.2013. godine. Prema tom izvještaju nisu prikazana sredstva u iznosu od 42.000.000 KM. Na primjer, Federalnom ministarstvu poljoprivrede, vodoprivrede i šumarstva nisu prikazane obaveze za poticaje od 1.909.270 KM. Da li misle ovakav izvještaj prihvatiti ili preispitati i pozvati odgovorne na odgovornost?

Jasna Duraković-Hadžiomerović prvu inicijativu uputila je Predstavničkom domu Parlamenta Federacije BiH i traži da Federalno ministarstvo obrazovanja i nauke koje odobrava sredstva za realizaciju projekta predvidi procedure u skladu sa zahtjevima i obaveže obrazovne institucije "putem kojih se doznaju sredstva za određene projekte" da se moraju pridržavati zakonskih akata i procedura navedenih u projektu te da svojim zahtjevima ne ometaju realizaciju projekta.

Druga inicijativa kojom traži da se oformi služba za odnose sa javnošću i koncipira, uskladi, usvoji i implementira predloženi pravilnik o radu službe za odnose sa javnošću koja će u narednom mandatnom periodu biti uvrštena kao sastavni

dio/dodatni član općih odredbi tačke 4. Javnost rada Poslovnika o radu Predstavničkog doma Parlamenta Federacije BiH.

Pitanje je uputila predsjedavajućem Predstavničkog doma Parlamenta Federacije BiH Edinu Mušiću sa osvrtom na prethodno iznesenu inicijativu donošenja, usvajanja i implementacije pravilnika o radu službe za odnose sa javnošću i osposobljavanja te službe – kada i u kojem vremenskom periodu bi se taj projekt mogao realizirati?

Vesna Švancer prvo pitanje postavila je Ekonomsko-socijalnom vijeću i Vladi Federacije BiH i pita u kojoj je fazi Zakon o radu?

Drugo pitanje uputila je Federalnoj upravi za inspeksijske poslove – traži da joj se dostavi izvještaj o radu i provedenim aktivnostima u protekloj godini Inspekcije za okoliš, koja je dislocirana u Zenici sa posebnim akcentom na ispunjavanje uvjeta za okolišne dozvole vezano uz pogone Arcelor Mittala u Zenici.

Treće pitanje uputila je Predstavničkom domu a budući da je član Komisije za izbjegla i raseljena lica, koja se još nije sastala, pa pita – kada će početi raditi budući da je dobar dio izbjeglih i raseljenih lica pogođen prošlogodišnjim poplavama?

Četvrto pitanje – kada će u parlamentarnoj proceduri biti Zakon o šumama, koji je u ovom Domu padao više puta?

Slavica Josipović prvo pitanje uputila je direktoru Civilne zaštite Federacije BiH, kojim traži informaciju na koji način Civilna zaštita funkcionira, sa posebnim osvrtom na Pravilnik o sistematizaciji radnih mjesta. U toj informaciji traži da joj se dostavi broj uposlenih, kao i nacionalna struktura u Civilnoj zaštiti Federacije BiH. Posebno je interesuje na koji način funkcionira Sektor za organizaciju deminiranja i uništavanja neeksplozivnih ubojnih sredstava. Traži da joj se dostavi u periodu 2010.-2015. broj uposlenih, nacionalna struktura kao i sve promjene koje su se dešavale u ovom periodu a odnose se i na broj penzionisanih i primljenih, preraspodjelu unutar ovog sektora i promjene nadležnosti unutar ovog sektora. Traži da joj se odgovor dostavi do naredne sjednice.

Drugo pitanje uputila je Federalnom ministarstvu prometa i komunikacija – traži od sadašnjeg ministra da utvrdi na koji način je dosadašnja Vlada utvrdila cijenu cestarine na dionici autoceste Lašva – sjever, Sarajevo - sjever i Zenica – jug – Sarajevo - sjever. Po kojoj metodologiji se došlo do ove cijene na ovim dionicama?

Treće pitanje upućuje direktoru JP Autoceste Federacije BiH - raspisan je konkurs za dodjelu 25 stipendija studentima u Federaciji BiH pa pita koji su studenti dobili stipendije od JP Autoceste Federacije BiH?

Šemsudin Kavazović postavio je pitanje vezano uz poljoprivredu i poticaje. Kazao je da poljoprivrednici iz Gradačca nisu dobili poticaj za mlijeko, kukuruz, pšenicu itd. za period 2013. - 2014. godina. Pa pita ministricu finansija šta je sa ovim poticajima i kada će biti isplaćeni?

Nasir Beganović prvo pitanje uputio je JP Autoceste Federacije BiH – zašto preduzeće “Euro asfalt” kao izvođač radova na autoputu nije postupalo po sporazumima o korištenju parcela, posebno u dijelu autoceste na izlazu iz tunela Prvi mart, sjeverna strana – izlaz prema Zenici - tačnije dionica Gorica - Drivuša. Na osnovu sporazuma bio je dužan da nakon njihovog korištenja, parcele humanizira, odnosno vrati ih u prvobitno stanje kako bi ih vlasnici, koji su sa njima sklopili ugovor, mogli neometano koristiti. Smatra da je neprimjereno da se nakon završetka radova ostavi neuređeno tlo.

Drugo pitanje uputio je Agenciji za državnu službu Federacije BiH od koje traži informacije u vezi sa brojem aktivnih konkursa za prijem državnih službenika u

periodu od kada je Vlada donijela Odluku o stavljanu moratorija na zapošljavanje u državnoj službi i javnim preduzećima.

Sljedeće pitanje uputio je predsjedniku Federacije BiH, zamjenicima predsjednika Federacije, premijeru Vlade Federacije i svim ministrima u Vladi Federacije – koliko imaju savjetnika, koliko već angažiranih, njihova imena i prezimena, stručna sprema, te kraći CV?

Munib Jusufović inicijativu je uputio predsjedavajućem i Kolegiju Predstavničkog doma Parlamenta Federacije BiH, kojom predlaže da se u najkraćem roku sazove posebna sjednica o sigurnosnoj situaciji u Federaciji BiH sa posebnim aspektom na sigurnosnu situaciju u BiH, region sa svim aspektima koji utiču na sigurnost u Federaciji.

Drugo pitanje - traži od Vlade Federacije BiH, premijera, predsjednika i potpredsjednika Federacije informaciju o uposlenim sa krajem petog mjeseca tekuće godine.

Jasmina Zubić postavila je tri pitanja.

Prvo pitanje - da li je realiziran zaključak donesen na 49. sjednici Predstavničkog doma Parlamentarne skupštine BiH koji glasi: "Zadužuje se Ministarstvo za ljudska prava BiH da uspostavi centralnu bazu podataka za počinjena djela diskriminacije, što je propisano u članu 8. Zakona o zabrani diskriminacije u BiH." Ovo pitanje upućuje Ministarstvu za ljudska prava i izbjeglice BiH.

Drugo pitanje – da li je realiziran Zaključak donesen na 49. sjednici Predstavničkog doma Parlamentarne skupštine BiH koji glasi: "Predstavnički dom Parlamentarne skupštine BiH obavezuje Vijeće ministara da u roku 90 dana izradi preporuke i plan za smanjenje diskriminacije u oblasti mobinga i obrazovanja imajući na umu godišnji izvještaj o pojavama diskriminacije za 2012. godinu u kojima je primjetan trend porasta broja pritužbi iz ovih kategorija prava?"

Treće pitanje – kada će se na dnevnom redu Doma naroda naći Zakon o šumama?

Elvir Karajbić je, u ime Kluba zastupnika SDP, podnio dvije inicijative. Prva se odnosi na sigurnosnu situaciju u Federaciji BiH. Klub zastupnika SDP-a smatra da treba održati sjednicu Predstavničkog doma na kojoj će se prioritetno raspravljati o sigurnosnom stanju u Federaciji BiH.

Druga inicijativa odnosi se na formiranje privremene komisije za ispitivanje zakonitosti plasmana kredita u švicarskim francima. Zadatak ove komisije bio bi da utvrdi činjenično stanje o plasiranju kredita u švicarskim francima i sačini izvještaj o eventualnim nezakonitostima i dostavi ga u oba doma Parlamenta Federacije BiH, Vladi Federacije BiH i nadležnom tužilaštvu.

Pitanje je postavio Vladi Federacije BiH i resornom ministarstvu – da li oni imaju namjeru izvršiti uplatu predviđenih budžetskih sredstava za uvezivanje radnog staža radnicima IP Krivaja koji su stekli uvjete za penziju i ako imaju namjeru, kada će to izvršiti.

Sead Jusić postavio je dva pitanja.

Prvo pitanje vezano je uz inicijative koje se tiču sigurnosne situacije, koje su zastupnici već upućivali. Pa pita – ko je i kojim zakonom utvrdio simbole i obilježja koji izazivaju međunacionalnu netrpeljivost, mržnju i slično? Konkretno, po kojem zakonu je isticanje zastave međunarodno priznate države Republike BiH, koja je bila službena zastava naše države od 1992. do 1996. godine, čin izazivanja međunacionalne netrpeljivosti i mržnje? Pitanje je u vezi sa hapšenjem Bošnjaka u Orahovi kod Bosanske Gradiške, navodno zbog isticanja zastave na svadbi. Traži da mu na ovo pitanje odgovori Ministarstvo pravde BiH i Federalno ministarstvo pravde.

Drugo pitanje – koliko je sudski spor Envera Krese koštao Elektroprivredu BiH i Federaciju BiH nakon svih obračunatih plaća, sudskih troškova i kamata (Enver Kreso, raniji direktor Elektroprivrede, sudskom odlukom ima se vratiti na dužnost direktora).

Sanel Razić inicijativu upućuje Vladi Federacije BiH kojom traži da Vlada Federacije BiH pripremi izmjene i dopune Zakona o stečajnom postupku (“Službene novine Federacije BiH”, br. 29/03, 32/04 i 42/06) koji je Vlada Tuzlanskog kantona prihvatila Zaključkom broj: 02/1-02-7305/15 od 24.03.2015. godine.

Bajro Makić pokrenuo je inicijativu prema Vladi Federacije BiH za izmjenu i dopunu Zakona o konsolidaciji privrednih društava u Federaciji BiH (“Službene novine Federacije BiH”, br. 52/14).

Zukan Helez pitanje je uputio direktoru Zavoda PIO/MIO, ministru rada i socijalne politike Mandiloviću i premijeru Novaliću – zbog čega sve više i više kasne penzije, koliko sredstva nedostaje u Fondu za redovnu isplatu penzija? Posebno ga zanima isplata povoljnih penzija. Direktor Zavoda PIO/MIO uputio je ministru zahtjev za smanjenje povoljnih penzija i pita - u kojem iznosu, kojem procentu i koliko tu sredstava nedostaje?

Kasim Mulalić je, između ostalog, kazao da je Vlada Federacije BiH na 104. sjednici (20.03.2014.) donijela Odluku o kategorizaciji cesta u autoceste, brze ceste, magistralne ceste i regionalne ceste. Donesena je Odluka o prekategorijski postojećeg regionalnog puta RP401 u viši rang saobraćajnice. Postojeći regionalni put prekategorijsan je u magistralni put drugog reda, službene oznake “M201 Velika Kladaša – Vrnograč - Radića most – Bužim - Bosanska Otoka”. Ono što je definirano spomenutom odlukom za općinu Bužim leži i u činjenici da je izvršena prekategorijska i postojeća dva lokalna puta u rang regionalnih puteva drugog reda a radi se o lokalnim putevima koji povezuju teritoriju općina Bužim, Cazin i Velika Kladaša i to: 1. Donja Koprivna - Gornja Koprivna – Velići - Ljubijankića most - Pašin brod – Lubarda - spoj sa M201, službena oznaka R157; 2. Gornji Purići - Todorova i Todorovo - Pašin brod, službena oznaka R158; 3. Kupusnica – Ljubijankići, službena oznaka R159. Preuzimanje kategorisanih puteva trebalo se desiti 15.11.2014. godine, ali je Vlada Federacije BiH promijenila datum, te je naveden datum za preuzimanje puteva kategorisanih u viši rang kao 15.03.2018. godine. Traži da Vlada Federacije BiH ozbiljno razmotri ovu problematiku i da krajnji cilj i rezultat bude donošenje odluke o promjeni datuma za potpunu primjenu, realizaciju i implementaciju Odluke o kategorizaciji cesta u Federaciji BiH kako je definirano.

Boris Marjanović pitanje je uputio Federalnom ministarstvu rudarstva, energetike i industrije, a vezan je uz status preduzeća Vitezit. Radi se o tvornici namjenske industrije koja je i ranijih godina imala velikih problema sa skladištenjem opasnih materijala (otpadne kiseline, eksplozivne materije) pa pita – šta se u narednom periodu planira kako bi se omogućila zaštita od posljedica koje se mogu imati od nezbrinjavanja tog opasnog materijala?

Mensud Borović pokrenuo je inicijativu kojom od Vlade Federacije BiH traži da dostavi zastupnicima pregled svih agencija, zavoda, fondova, direkcija i uprava koji egzistiraju na nivou Federacije BiH, odnosno one koje su formirane od Parlamenta Federacije BiH i Vlade Federacije BiH. Također, traži podatke o njihovoj nadležnosti, sjedištu i imenu rukovodilaca.

Amir Zukić je u skladu sa Poslovníkom uputio Nacrt Zakona o naučno-tehničkom stvaralaštvu Federacije BiH.

Damir Mašić uputio je dva pitanja Agenciji za predškolsko, osnovno i srednje obrazovanje u BiH.

Prvo pitanje – koliko imaju uposlenih i koja je njihova nacionalna struktura?

Drugo pitanje – šta je Agencija uradila po pitanju učestvovanja u dva značajna obrazovna projekta na nivou EU, budući da država BiH ima obavezu učestvovati u tim projektima, a to su projekti PISA 2018. i TEAMS?

Predsjedavajući je predložio zastupnicima da se o predloženim inicijativama na današnjoj sjednici izjašnjava na narednoj sjednici kao što je to i ranije bila praksa, što su zastupnici prihvatili.

Prije nego se krenulo sa utvrđivanjem dnevnog reda, predsjedavajući je pozvao novoizabranog zastupnika Olivera Radoša da da svečanu izjavu, budući da na početku sjednice nije bio prisutan.

Usljedilo je davanje svečane izjave, a potom se prešlo na utvrđivanje dnevnog reda.

Vlada Federacije BiH uputila je dopis kojim iz procedure povlači Prijedlog Odluke o davanju saglasnosti na Odluku o izmjenama i dopunama Statuta Agencije za kvalitet i akreditaciju u zdravstvu u Federaciji BiH.

Ured ombudsmena poslao je zahtjev da se tačka – Godišnji izvještaj o rezultatima aktivnosti Institucije ombudsmena za ljudska prava BiH za 2013. godinu - povuče sa dnevnog reda jer Ured nije poslao izvjestioca na sjednicu.

Visoko sudsko i tužilačko vijeće je, također, tražilo da se 11. tačka – Izvještaj Visokog sudskog i tužilačkog vijeća BiH, Godišnji izvještaj za 2013. godinu - povuče sa dnevnog reda, odnosno da se razmatra na narednoj sjednici jer izvjestilac nije u mogućnosti prisustvovati zbog sjednice VTSV-a.

Prijedlog Vlade Federacije BiH je da se Prijedlog Zakona o izmjeni Zakona o poštanskom prometu Federacije BiH raspravlja po hitnom postupku.

U raspravi o hitnosti postupka Prijedloga Zakona raspravljao je Nasir Beganović.

Sa 61 glasom za, uz 18 glasova protiv i uz četiri uzdržana glasa, usvojeno je da se Prijedlog Zakona o izmjeni Zakona o poštanskom prometu Federacije BiH raspravlja po hitnom postupku.

Sa 59 glasova za, uz dva glasa protiv i uz 17 uzdržanih glasova, usvojen je sljedeći:

D N E V N I R E D

1. Prijedlog Zakona o izmjeni Zakona o poštanskom prometu Federacije BiH – hitni postupak,
2. Prijedlog Odluke o prihvatanju zaduženja po Sporazumu drugog programskog zajma između BiH i Svjetske banke – Međunarodne banke za obnovu i razvoj (IBRD) za razvojne politike poslovnog okruženja,
3. Prijedlog Odluke o prihvatanju zaduženja po Okvirnom sporazumu o zajmu između BiH i Razvojne banke Vijeća Evrope (CEB) za realizaciju Projekta zatvaranja kolektivnih centara i alternativnog smještaja,
4. Prijedlog Odluke o prihvatanju zaduženja po Sporazumu o finansiranju između BiH i Međunarodnog fonda za poljoprivredni razvoj (IFAD) za realizaciju Projekta razvoja ruralnog poslovanja (RBDP),
5. Izvještaj o izvršenju Budžeta Federacije BiH za period od 01.01. do 31.12.2014. godine,
6. Izvještaj o zaduženju Federacije BiH na osnovu emisije obveznica,

7. Izvještaj o zaduženju Federacije BiH na osnovu emisije trezorskih zapisa dostavljenih 03.07.2014.; 22.08.2014.; 05.09.2014. i 20.03.2015. godine,
8. Izvještaj o radu Federalnog zavoda za zapošljavanje za 2013. godinu,
9. Informacija o vanjskom i unutrašnjem dugu Federacije BiH na dan, 31.12.2013. godine,
10. Izbori i imenovanja.

1. Prijedlog Zakona o izmjeni Zakona o poštanskom prometu Federacije BiH – hitni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Predstavnik Vlade Federacije BiH dodatno je obrazložio Prijedlog Zakona.

U raspravi su učestvovali: Nasir Beganović, Boris Barun, Kasim Mulalić, Faruk Ćupina i Dennis Gratz.

Sa 56 glasova za, uz 17 glasova protiv i uz devet uzdržanih glasova, usvojen je Prijedlog Zakona o izmjeni Zakona o poštanskom prometu Federacije BiH.

2. Prijedlog Odluke o prihvatanju zaduženja po Sporazumu drugog programskog zajma između BiH i Svjetske banke – Međunarodne banke za obnovu i razvoj (IBRD) za razvojne politike poslovnog okruženja

Prijedlog Odluke sa pratećim materijalima dostavila je Vlada Federacije BiH.

Dodatno obrazloženje dao je Vedad Nezirić, šef Odsjeka za zaduživanje i koordinaciju sredstava za razvoj u Federalnom ministarstvu finansija.

U ime Odbora za ekonomsku i finansijsku politiku obrazlagao je Dženan Đonlagić, te između ostalog kazao da bi se trebao donijeti zaključak da se od korisnika sredstava traži da godišnje redovno izvještavaju Predstavnički dom Parlamenta Federacije BiH o namjenskom utrošku sredstava.

U raspravi je učestvovao Sanel Razić.

Sa 53 glasa za, uz sedam glasova protiv i uz 19 uzdržanih glasova, usvojen je Prijedlog Odluke o prihvatanju zaduženja po Sporazumu drugog programskog zajma između BiH i Svjetske banke – Međunarodne banke za obnovu i razvoj (IBRD) za razvojne politike poslovnog okruženja, uz zaključak da se od korisnika sredstava traži da godišnje redovno izvještavaju Predstavnički dom Parlamenta Federacije BiH o namjenskom utrošku sredstava.

3. Prijedlog Odluke o prihvatanju zaduženja po Okvirnom sporazumu o zajmu između BiH i Razvojne banke Vijeća Evrope (CEB) za realizaciju Projekta zatvaranja kolektivnih centara i alternativnog smještaja

Prijedlog Odluke sa pratećim materijalima dostavila je Vlada Federacije BiH.

Dodatno obrazloženje dao je Vedad Nezirić, šef Odsjeka za zaduživanje i koordinaciju sredstava za razvoj u Federalnom ministarstvu finansija.

U ime Odbora za ekonomsku i finansijsku politiku obrazlagao je Dženan Đonlagić.

U raspravi je učestvovao Mehrudin Švago.

Sa 56 glasova za, uz četiri glasa protiv i uz 18 uzdržanih glasova, usvojen je Prijedlog Odluke o prihvatanju zaduženja po Okvirnom sporazumu o zajmu između BiH i Razvojne banke Vijeća Evrope (CEB) za realizaciju Projekta zatvaranja kolektivnih centara i alternativnog smještaja.

4. Prijedlog Odluke o prihvatanju zaduženja po Sporazumu o finansiranju između BiH i Međunarodnog fonda za poljoprivredni razvoj (IFAD) za realizaciju Projekta ruralnog poslovanja (RBDP)

Prijedlog Odluke sa pratećim materijalima dostavila je Vlada Federacije BiH. U ime Odbora za poljoprivredu, vodoprivredu i šumarstvo obrazloženje je dao Bajro Makić.

U raspravi su učestvovali: Muhamed Ibrahimović, Dženan Đonlagić, Nasir Beganović, Zana Marjanović i Enver Merdić.

Sa 71 glasom za, uz tri glasa protiv i uz pet uzdržanih glasova, usvojen je Prijedlog Odluke o prihvatanju zaduženja po Sporazumu o finansiranju između BiH i Međunarodnog fonda za poljoprivredni razvoj (IFAD) za realizaciju Projekta ruralnog poslovanja (RBDP).

Muhamed Ibrahimović predložio je zaključak o kojem su se zastupnici izjašnjavali.

Sa 71 glasom za, uz dva glasa protiv i uz dva uzdržana glasa, usvojen je sljedeći:

Z A K L J U Č A K

Zadužuje se Vlada Federacije BiH, odnosno resorna ministarstva da sačine cjelovitu informaciju o implementaciji i efektima ovih zaduženja kako bi Parlament Federacije BiH bio upoznat sa onim na šta je dao saglasnost i da se informacija dostavlja najmanje jednom godišnje.

Pauza do 14.30.

5. Izvještaj o izvršenju Budžeta Federacije BiH za period od 01.01. do 31.12.2014. godine

Izvještaj su razmatrala nadležna radna tijela i dostavila izvještaje.

Dodatno obrazloženje dao je Pero Ivošević, pomoćnik u Federalnom ministarstvu finansija.

U ime Odbora za ekonomsku i finansijsku politiku obrazloženje je dao Dženan Đonlagić.

U raspravi su učestvovali: Mahir Nurkanović, Radoslav Luburić, Dževad Agić, Jasna Duraković-Hadžiomerović, Nasir Beganović, Mehruđin Švago, ministrica Jelka Milićević, Dennis Gratz, Faruk Čupina, Ivan Musa, Sanel Razić i Munib Jusufović.

Predsjedavajući je pozvao zastupnike da se izjasne o Izvještaju o izvršenju Budžeta Federacije BiH za period od 01.01. do 31.12.2014. godine, koji nije usvojen (39 glasova za, 27 glasova protiv i 12 uzdržanih glasova).

6. Izvještaj o zaduženju Federacije BiH na osnovu emisije obveznica

Izvještaj je dostavila Vlada Federacije BiH.

Izvještaj su razmatrala nadležna radna tijela i dostavila izvještaje.

Predstavnik Vlade Federacije BiH dao je dodatno obrazloženje.

U ime Odbora za ekonomsku i finansijsku politiku obrazlagao je Dženan Đonlagić. Predložio je da ubuduće, kako je to zakonom definirano, bude izvještaj o izvršavanju budžeta a da podatke, odnosno analitiku onoga što se u tom budžetu putem pozicije primitaka realizira putem emisije obveznica i emisije trezorskih zapisa, dostavlja kao informacija.

U raspravi niko nije učestvovao.

Predstavnički dom primio je na znanje Izvještaj o zaduženju Federacije BiH na osnovu emisije obveznica.

7. Izvještaj o zaduženju Federacije BiH na osnovu emisije trezorskih zapisa dostavljenih 03.07.2014.; 22.08.2014.; 05.09.2014. i 20.03.2015. godine

Izvještaje je dostavila Vlada Federacije BiH.

U ime Vlade Federacije BiH niko nije obrazlagao.

U ime nadležnih odbora niko nije obrazlagao.

U raspravi niko nije učestvovao.

Predstavnički dom primio je na znanje Izvještaj o zaduženju Federacije BiH na osnovu emisije trezorskih zapisa dostavljenih 03.07.2014.; 22.08.2014.; 05.09.2014. i 20.03.2015. godine.

8. Izvještaj o radu Federalnog zavoda za zapošljavanje za 2013. godinu

Direktor Federalnog zavoda za zapošljavanje Kenan Rešo dao je dodatno obrazloženje.

U raspravi je učestvovala Zana Marjanović.

Sa 53 glasa za, uz 15 glasova protiv i uz 15 uzdržanih glasova, Predstavnički dom prihvatio je Izvještaj o radu Federalnog zavoda za zapošljavanje za 2013. godinu.

9. Informacija o vanjskom i unutrašnjem dugu Federacije BiH na dan, 31.12.2013. godine

Vlada Federacije BiH dostavila je Informaciju o vanjskom i unutrašnjem dugu na dan, 31.12.2013. godine.

Predstavnik Vlade Federacije BiH dao je dodatno obrazloženje.

U raspravi su učestvovali: Azra Hodžić, Elvir Karajbić, Dario Knezović, Sanel Razić, Enver Merdić, Damir Mašić, Radoslav Luburić i Ivan Musa.

Predstavnički dom Parlamenta Federacije BiH primio je na znanje Informaciju o vanjskom i unutrašnjem dugu Federacije BiH na dan, 31.12.2013. godine.

10. Izbori i imenovanja

Komisija za izbor i imenovanja Predstavničkog doma Parlamenta Federacije BiH je na 6. sjednici, održanoj 12.05.2015. godine, razmatrala: 1.) Razrješenje Nezira Pivića dužnosti člana Nezavisnog odbora; 2.) Izmjene u radnim tijelima Predstavničkog doma Parlamenta Federacije BiH i 3.) Okvirni plan aktivnosti Komisije u narednom periodu.

Safet Kešo je, u ime Komisije, dao dodatno obrazloženje.

U raspravi niko nije učestvovao.

Sa 81 glasom za, bez glasova protiv i bez uzdržanih glasova, Predstavnički dom donio je Odluku o razrješenju člana Nezavisnog odbora Nezira Pivića.

Sa 79 glasova za, bez glasova protiv i uz jedan uzdržani glas, Predstavnički dom donio je Odluku o izboru i razrješenju nekih predsjednika, zamjenika i članova radnih tijela Predstavničkog doma Parlamenta Federacije BiH.

Predsjedavajući je zaključio rad 1. redovne sjednice Predstavničkog doma Parlamenta Federacije BiH u 16.37.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Daniela Čegar

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić